

Accion di protesta dilanti beach na St. Regis Hotel:

Segun polis a informa, tereno di hotel ta un tereno eigendom desde 1990 cu te awor a ser desaroya

Ayera den oranan di atardi riba e beach situa dilanti St. Regis Hotel cu recientemente a habri su portanan a tuma luga un accion di protesta di parti di activistanan local cu a expresa nan indignacion y disgusto pa e hecho cu e hotel a tuma over e beach cu antes localnan tabatin e oportunidad di disfruta di dje.

For di algun dia caba e topico di e parasol- y stoelnan cu e hotel a ubica riba e beach, tumando over asina practicamente henter e area di e beach caminda antes tabatin algun palapa y cu ciudadanonan tabata disfruta di dje, ta un topico cu a ricibi hopi atencion den ultimo simanan.

Riba rednan social sobretodo tanto ciudadanonan local como bishitantenan a expresa nan malcontento pa e hecho cu otro beach di Aruba, cu ta un luga conoci pa localnan pasa dia, a ser kita pa motibo di turismo.

Bon Dia Aruba a bin ta sigui di cerca e desaroyo di e situacion aki, te na e accion di protesta cu a tuma luga ayera dilanti e hotel.

E conocido activista Nigel Maduro tabata presente,



hunto cu otro activista- y personanan cu ta apoye den su lucha contra construccion di mas hotel y destruccion di patrimonio y herencia natural di Aruba. Polis tambe tabata presente ken a maneha e situacion cu calma pa asina esaki no escala for di man.

Maduro, a alsa su voz y a cuestiona con por ta posibel cu ta kita mas y mas espacio di localnan pa duna prioridad na turista. Na mesun momento e tabata cobando un buraco na e base di un parasol cu e hotel a instala riba beach pa asina demostra con profundo e parasol ta instala, mientras e tabata cuestiona con tortuganan ta haci pa pone nan webonan si nan no tin espacio mas.

Polis, na su turno tabata spliando tur presente cu aunke nan tur tin derecho di protesta, ta importante pa haci esaki segun ley. E polis a splica cu a base di informacion ricibi directamente for di DIP, e tereno en cuestion ta un tereno cu ta eigendom, pues propiedad priva, cu a ser bendi desde aña 1990 y cu no a ser desaroya te aworaki.

E polis tabatin un mapa cu a bin for di DIP den cual por mira e liñanan cu ta marca e propiedad di tereno cu ta di e hotel, te unda esaki ta yega y kico ta loke ta beach publico.

Mester remarca cu e informacion cu e agente policial a trece dilanti ta contradeci informacion cu Bon Dia Aruba a ricibi for di ex minister di infraestructura, Otmar Oduber y prome minister demisionario Evelyn Wever-Croes.

Segun e informacion cu prome minister a brinda na Bon Dia Aruba, cu a ser suministra pa DOW na su persona, e tereno di e hotel en cuestion ta un tereno cu a ser otorga den erfpacht den aña 2006 unda a resta mas o menos di 21 meter, midi for di canto di lama, cual zona ta beach publico.

Ex minister di Infraestructura, Otmar Oduber, tambe a indica cu den e caso specifico aki, e hotel a haya e derecho di tin un precario mescos cu tur otro hotel cu ta riba beach y hasta esnan cu no ta riba beach.

El a enfatisa cu tur hotel a haya e derecho adkiri na momento cu gobierno ta duna nan pa ley un tereno pa ser desaroya cu nan por haci uso



di un precario riba beach. E precario aki e hotel ta paga p'e pa aña, y ta ser regla den e maneho y pues loke ta tumando luga dilanti e hotel na e momentonan aki ta conforme e ley ey cu a ser implementa.

El a remarca cu e hotel ta pone parasol na e tereno dilanti ta parti di e precario cu e ta paga como esun cu ta desaroyando e tereno erfpacht, pero si un persona, como ciudadano Arubiano kier sinta bou di e palapa, sin mishi cu e parasol y sin mishi cu e stoel, niun hende no por prohibi esaki pasobra ley ta bisa cu beach ta habri, e tereno di e beach ta keda publico.

Di otro banda polis a infor-

ma ayera durante e protesta cu e tereno di hotel ta priva, un tereno eigendom cu a ser bendi den aña 1990 y no un tereno erfpacht cu gobierno a entrega na 2006.

